

Il Grischun dumbra passa 190 000 abitantas ed abitants

Infurmaziun da L'Uffizi per economia e turissem dal Grischun

■ (cp) **Entaifer ils ultims onns è creschida la populaziun grischuna per 0,9%. La fin da l'onn 2008 han pia 190 459 personas gi lur domicil en il Grischun.** L'augment po vegnir attribui sulettamain a l'immigraziun da personas da l'exteriur, entant ch'il dumber da naschientschas è stagnà en il Grischun.

Augment pli ferm da la populaziun en il Grischun

Cun 190 459 personas ils 31 da december 2008 è il dumber da la populaziun residenta permanenta dal chantun Grischun per 0,9% pli aut che l'onn precedent (188 762); dapi il cumenzament dals onns 90 è la populaziun mai pli creschida uschè ferm durant in onn. Malgrà quai è l'augment da la populaziun grischuna er l'onn 2008 cleramain sut la media svizra dad 1,4%.

Grondas differenzas tar il svilup regional

Entaifer il chantun è il dumber da la populaziun sa sviluppa en moda differenta l'onn 2008. En l'Engiadina'Ota è la populaziun creschida il pli fitg cun +2,0%. In augment relativ ferm datti er en l'Engiadina Bassa (+1,6%) sco er en la regiun Grischun dal nord (+1,5%). Tavau, la Viamala sco er trais regiuns talianas (Bregaglia, Mesolcina e Calanca) han medemamain pudì registrar ina creschientscha detg considerabla, entant ch'il Partenz ed il Puschlav èn stagnads. La Surselva (-0,3%), la regiun Grischun central (-0,5%) sco er la Val Müstair (-1,5%) han stuì prender en cumpra ina reduziun da la populaziun.

Puspè in saldo negativ da las naschientschas

En cumparegliazium cun l'onn precedent èn las naschientschas stagnadas l'onn 2008 sin in nivel bass en il Grischun (1597 envers 1599 l'onn precedent). L'onn passà èn vegnids registrads 1631 mortoris, uschia ch'il Grischun registrescha puspè in saldo negativ da las naschientschas (-34). Cunzunt la Surselva, il Partenz e la Mesolcina han notà reduziuns pli grondas da las naschientschas

Remartgabel è en quest connex ch'il saldo positiv da las naschientschas da la populaziun residenta estra (+202) cumpensescha bunamain la tendenza fitg negativa da la populaziun svizra (-236)

Gronda immigraziun dals stadis vegls da la UE

Damai ch'il Grischun registrescha er per l'onn passà in saldo negativ da migraziun

tranter ils chantuns, po l'augment da la populaziun sulettamain vegnir attribui a l'immigraziun d'in fitg grond dumber da personas da l'ester.

La part da la populaziun residenta permanenta estra è s'augmentada entaifer in onn da 14,8% a 15,6%. Per la fin da l'onn 2008 han perquai 29 619 burgaisas e burgais esters gi lur domicil fix en il Grischun.

Il pli ferm è l'onn passà er creschì il dumber da las abitantas e dals abitants da la Germania (+14%). Ellas ed els han uschia pudì extender lur posiziun sco gruppa da personas estras la pli gronda en il Grischun. Er il dumber d'abitantas e d'abitants portugais è creschì a bunamain 10%, entant ch'il dumber da personas da l'Italia u dals pajais dal Balcan è stagnà u schizunt sa reduci. Las gruppas relativamain pitschnas d'immigrantas e d'immigrants dad ulteriurs pajais da l'Europa occidentala sco da la Gronda Britannia, da

la Frantscha e dals Pajais Bass èn creschidas pli ferm l'onn passà.

L'onn 2008 han 576 personas pudì acquistar il dretg da burgais svizzer en il Grischun.

La gronda part viva en vischnancas grondas

Circa 3/4 da la populaziun grischuna vivan en vischnancas che han dapli che 1000 abitantas ed abitants

La fin da l'onn 2008 dumbra il Grischun anc 26 vischnancas cun main che 100 abitantas ed abitants, ulteriuras 103 vischnancas avevan main che 500 abitantas ed abitants. Totalmain abitavan anc ca. 15% da la populaziun en questas vischnancas pitschnas.

Var 75% da la populaziun grischuna vivan gia oz en vischnancas che han dapli che 1000 abitantas ed abitants. Cun las numerusas fusiuns da vischnancas, ch'èn vegni-


das messas en vigur il cumenzament da l'onn 2009 u ch'èn vegnidas conclusidas per il cumenzament da l'onn 2010, vegnan ils pais – a chaschun da las proximas dumbraziuns – a sa spustar anc pli ferm en direzziun da las vischnancas grondas.

Exempel: 26 vischnancas u 12,8% da tut las vischnancas han main che 100 abitantas ed abitants. En questas 26 vischnancas vivan 1573 personas u 0,9% da tut la populaziun dal chantun Grischun.

Maridar è vinavant en moda

L'onn passà è vegnì maridà 932 giadas en il Grischun (onn precedent: 898); quest dumber crescha gia dapi quatter onns puspè. Ultra da quai èn vegnids registrads l'onn passà 10 partenadis registrads. Il dumber dals divorzis sa reducescha dapi intgins onns; l'onn passà èn vegnidas separadas 400 letgs en il Grischun, quai èn 31 damain che l'onn precedent.

La populaziun residenta permanenta ils 31 da december 2008 tenor regiuns



Midada da la populaziun residenta permanenta 2008 tenor regiuns

